

Tants incendis – datti in connex u indizis per ina seria?

Polizia e Procura publica na vesan nagina colliaziun

DA CLAUDIA CADRUVI / ANR

■ **Entaifer in mais brischi sis giadas en il conturn da Cuira. Trais giadas ston ils pumpiers evacuar passa 50 personas. L'incendi en la halla d'autos da posta chaschuna donns da 10 milliuns francs. Èsi casualità? Datti indizis per ina seria?** «I brischa sch'i brischa», di il pledader da la polizia chantunala *Markus Walser*. I crodia schon si ch'i haja l'ultim temp brischè savens, ma extraordinari na saja quai tuttina betg. Ina colliaziun tranter ils brischements na stettia betg en il center da las examinaziuns da la polizia.

Dus experts per incendis

Ils experts d'incendis sajan londervi da sclerir giu las raschuns, di *Walser*. Davart ils detagls na vul el far naginas indicaziuns. El sincerescha dentant: «Jau pos be dir che nossas examinaziuns na mussan nagins indizis ch'ils brischements avessan

ina colliaziun.» Dus experts d'incendis lavuran en il corps da la polizia chantunala. Els èn era responsabels per dumondas e lubientschas per material explosiv. Da preschent èn els sa chapescha fatschentads cun examinaziuns. Sin la dumonda sch'els survegnian uss anc agid dad experts d'ordaifer, di *Walser*: «Els survegnan sustegn dal servetsch da la tecnica criminala da la polizia chantunala.»

Activa è era la Procura publica

Cun intgins da quests incendis sa fatschenta era la Procura publica. Cronologicamain dumbra il pledader *Franco Passini* si: Sco emprim èsi il brischement en la Via Lürlibad a Cuira nua ch'in um è vegnì per la vita. Sco segund èsi l'incendi nua ch'in bab e ses dus uffants èn morts. E lura interquerian ins sa chapescha era l'incendi a la staziun d'autos da posta.

Auter vesi ora tar il feu tar la Ems Chemie e l'incendi dad ier tar il provisor dal convict a Cuira. Là n'haja la Procura publica anc betg avert ina procedura e la polizia examineschia sezza la chaussa. Era *Passini* sincerescha ch'i na dettia fin uss nagins indizis per ina colliaziun. «Tenor noss manegiar èn questas disgrazias capitadas independentamain ina da l'autra.»

Ma cura daventa la Procura publica insumma activa? E cura surlascha ella il cas a la polizia? Sche personas èn vegnidas blessadas u vegnidas per la vita daventa la Procura publica activa, explitgescha *Passini*. Ma era sch'i sa tracta dad in grond incendi, sch'i ha dà considerabels donns u sch'i dat indizis ch'insatgi haja dà feu. Sch'in brischement ha chaschunà mo pitschens donns e n'ha era betg de-



Stersas han 90 scolars stui vegnir evacuads cura che la fatschada dal provisor dal convict ha piglià feu.

FOTOS POLIZIA CHANTUNALA

struì material da terzas personas sclerescha la polizia il cas en atgna reschia.

Strapatschs per pumpiers

Ch'i haja brischè uschè savens saja schon spezial e tuttina nagut extraordinari, di il cumandant dals pumpiers da Cuira *Hansjörg Erni*. Adina puspè dettia quai fasas cun dapli brischements u plirs accidents da traffic. Entaifer in'emna possian capitar plirs incaps e lura puspè mais ora nagut. En talas fasas na saja er betg vesibel in muster, pia ch'ils accidents u brischements capitian adina da las medemas uras u adina en la medema stagion. Ils pumpiers da Cuira sajan in'organisaziun da milissa cun 95 pumpiers. Brischements cun blesads u morts na sajan betg uschè simpels

da magunar. Perquai mainian ins suentar adina discurs cun tut ils pumpiers cum-

pigliads e procura cun in debriefing ch'i na stettia betg enavos plagas psicicas.

Sis giadas entaifer in mais a Cuira e conturn

Stersas ha brischè in auto sper il provisor dal convict. Era la fatschada dal provisor ha piglià feu ed ins ha stui evacuar 90 scolars. La sonda passada hai dà in brischement avant ina halla da la Ems Chemie a Domat.

L'incendi en la halla dad autos da posta da l'emna passada ha destruì 20 cars. Ils donns vi dad autos da posta e bajetg summan sin 10 milliuns francs. Avant duas emnas èn vegnids per la vi-

ta in bab, ses figl e sia figlia tar in incendi en in'abitaziun a Cuira. Suentar la disgrazia ha la Procura publica immediat cumenzà cun examinaziuns pervi da supposiziuns ch'il bab haja dà feu. La fin da december ha ina sauna piglià feu a Pasqual. Il tetg-chasa è brischè giu cumpletamain.

Curt avant Nadal ha brischè in studio en la Via Lürlibad ed in grevblessà è mort in di pli tard.



I na dettia nagins indizis per colliaziuns tranter ils incendis, di il pledader da la polizia chantunala *Markus Walser*.